



**Les Fleurs Des Vies Des Saints Et Des Festes De Toute
L'Annee, Suivant L'Usage Du Calendrier Romain Reforme**

Augmentees des Saints & Bien-heureux Peres Iesuites, de Saint Charles
Borromeo, & de Sainte Françoise ; Avec le Martyrologe Romain, pour
tous les iours de l'Annee ...

Ribadeneyra, Pedro de

Paris, 1631

ix La vie de s. Gorgon mart.

[urn:nbn:de:hbz:466:1-75777](https://nbn-resolving.org/urn:nbn:de:hbz:466:1-75777)

LA VIE DE SAINT GORGON, Martyr.

L'Empereur Diocletian le 16. an de son Empire fit publier vn Edit en la ville de Nicomedie, par lequel il ordonnoit que toutes les Eglises des Chrestiens fussent ruinees rez pieds, rez terre, & les saints liures bruslez; que les Nobles fussent declarez roturiers, & les roturiers esclaves, s'ils refusoient d'adorer les dieux, il adiousta de puis, que tous les Prelats & chefs de l'Eglise de nostre Seigneur I. C. en quelque part qu'il seroient trouuez, fussent apprehendez, & contraincts à force de tourmens, de renier nostre sainte Religion. Vn braue cheualier Chrestien nommé Pierre, veid ceste impie & barbare ordonnance, lequel transporté de l'amour de Dieu, apres l'auoir leuë en la place publique où elle estoit affichee, la deschira, & mit en pieces, sans se soucier du courroux de l'Empereur, qui estoit en la mesme ville, ny du mal qui luy en pouuoit aduenir. Diocletian sortit des gonds, quand on luy apporta ce que Pierre auoit fait en depit de luy: Il le fit prendre, & exposer à autãt de cruels tourmens qu'on se pouuoit promettre de sa fureur & cruauté extraordinaire, esquels le bienheureux Martyr rendit l'esprit avec vne admirable constance & allegresse. En ce temps-là Diocletian auoit des Gentils-hommes de sa chambre, ses mignons, qui se nommoient Gorgon & Dorothee, & estoient Chrestiens couuerts, lesquels par leurs exemples & bons conseils, auoient attiré plusieurs de leurs compagnons à la Foy de Iesus-Christ, lesquels s'estãt tous deux trouuez presens aux tourmens de S. Pierre, furent si viuement touchez par son exemple, & embrasiez du desir de mourir pour Iesus-Christ, qu'ils parlerent tous deux à l'Empereur en ceste sorte: que veur dire cela, ô Diocletian, que vous ne faciez tourmenter que Pierre pour vn crime (s'il est tel) duquel nous sommes autãt coupables que luy? Si vous le faictes tourmenter, parce qu'il est Chrestien, nous le sommes aussi bien que luy, & tenons sa mesme Religion. Le tyran fut estonné d'entendre cela, & transi de cholere, changea l'amour qu'il portoit auparauant, en vne haine extreme. Il les fit fouetter cruellement & esgratigner la peau, puis ietter du sel & du vinaigre dans les playes, qui descouuroient leurs entrailles: cela fait on les mit sur la grille pour les rostir à petit feu, & leur rendre la mort d'autant plus sensible qu'elle seroit plus longue: en fin ils les estrangerent, & ces deux saints Martyrs rendirent leurs ames à Dieu, encore que Metaphrasite dit que Dorothee eut la teste tranchee, & Gorgon fut estranglé avec vne grosse pierre au col. Leurs corps furent enterrez par quelques Chrestiens. Depuis par succession de temps le corps de S. Gorgon fut porté à Rome, & enterré en la rue Latine, d'où le Pape Gregoire IV.

transporta en l'Eglise du Prince des Apostres S. Pierre, comme dit le Martyrologe Romain: celui de Bede, Vsuard, & Ado font mention de ces Ss. Martyrs le 9. de Septembre (auquel l'Eglise celebre leur feste) l'an 302. sous l'Empire dudit Diocletian.

A Comidiales Ss. Dorothee & Gorgonie, tenans lieu tres honorable en la Cour de l'Empereur Diocletian, & ne pouuant souffrir, ains detestans tout à plat la persecution qu'il menoit contre les Chrestiens, furent en sa presence, & par son commandement, premierement pendus en l'air puis à grands coups de fouet declivrez par tout le corps, & tellement escorchez qu'on leur voyoit les boyaux & intestins. Par apres ils furent saupoudrez de sel & de vinaigre, rostis sur le grill, & en fin estranglez. Le corps S. Gorgonie fut depuis porté à Rome, & enseuely sur le chemin qui mene au vieux Latium & de là transporté en l'Eglise S. Pierre. A treize mille hors de Rome tirant vers les Sabins, moururent les Ss. Martyrs Hiacinthe, Alexandre & Tiburces. A Sobasse S. Severin Senateur, ayant du temps de l'Empereur Licinien conuert plusieurs soldats à la Foy de nostre Sauueur, fut par le commandement du President Lise pendu, en l'air, avec vne grosse pierre à ses pieds, puis fouetté cruellement jusques à estre miserablement dechiré par tout le corps, durant lesquels tourmens il rendit l'ame à Dieu le remerciant de tant de biens qu'il receuoit de sa main. A mesme iour que S. Strabon fut pour le nom de nostre Sauueur lié à deux arbres, & deschiré. Item en d'auantrent les Ss. martyrs Ruffin & Ruffien freres. A Rome deceda S. Sergio Pape, successeur de Canon. A Terouane S. Omere Euesque & Confesseur En Escosse S. Queran abbé.

LA VIE DE S. NICOLAS, de Tolentin, Religieux de l'Ordre de S. Augustin.



Saint Nicolas de Tolentin, Religieux de l'Ordre du glorieux Pere & Docteur de l'Eglise S. Augustin, nasquit en vn village nommé S. Angel, de la ville de Ferme, qui est en la marque d'Ancone.

Son pere auoit nom Campagnan, & sa mere Aymee: c'estoient deux bons chrestiens qui auoient demeuré long temps en mesnage sans auoir d'enfans, dõt ils estoient fort ennuyez. La mere Aymee print pour Auocat S. Nicolas Euesque, auquel elle auoit vne particuliere deuotiõ, & promit d'aller visiter son corps, qui est en la ville de Bary, au Royaume de Naples, si Dieu (accomplissant son desir) luy donnoit vn fils. Ses parens eurent reuelation de faire ce voyage, auquel ils apprendroient quel seroit celui qui deuoit naistre d'eux. Ils allerent à Bary visiter l'Eglise de S. Nicolas, lequel s'apparut à eux & les assura qu'ils auoient vn fils, lequel seroit nommé Nicolas, à cause qu'ils l'auoient obtenu par son intercessiõ, qui seroit tres-fidelle seruiteur de Dieu, homme de bon exemple, & d'une grande penitence: ce qui arriva: Aymee deuint grosse, & accoucha d'un fils, qu'on nomma Nicolas, lequel dès son enfance estoit fort adonné à seruir Dieu: il frequentoit les Eglises, entendoit la messe, prioit deuotement, ne hãtoit point les desbauchez, aimoit la cõpagnie des Religieux, faisoit du bien aux pauvres, ieunoit & estudioit: il prioit avec telle atentiõ, qu'õ dit, qu'estãt ieune, faisoit oraisõ en l'Eglise, il vid N. S. I. C. des yeux corporels: à mesure qu'il croissoit, il profitoit en vertu. On le fit Chanoine de l'Eglise S. Sauueur, & encor' qu'il y vescuist hono-